

Il gaud raquinta Tredischin

■ **(cp) Quest'emna passentan 24 uffants da l'emprima fin la sisavla klasa primara da tut la Rumantschia in'emna da teater a Cumbel en Lumnezia.** Cun l'actura *Annina Sedlacek* ed il teatrist *Roman Weishaupt* elaboreschan ils uffants in toc da teater. L'istorgia che vegn dada dumengia proxima en il gaud da Cumbel è l'enconuschenta praula da Tredischin.

Tge è teater?

L'onn passà ha la Pro Svizra Rumantscha organisà per l'emprima giada cun success in champ da teater per affons rumantschs da la Bassa e la Rumantschia. Quel ha gi lieu sco teater da staziuns tras «Il cumin dals siemis» da Tschlin. Quist onn ha la PSR envidà ils uffants en la chasa patriziala Porclas a Cumbel. 24 uffants da tuts differents idioms han dà suatientscha. L'idea è da promover il contact denter ils uffants da las differents regiuns rumantschas.

Gliendisdi passà èn ils uffants arrivads da mezdi a Cumbel e già il suentermezdi han l'actura *Annina Sedlacek* ed il tea-

trist *Roman Weishaupt* cumenzà cun la lavur da teater. Il champ e las emprovas da teater èn intensivias. Mintga di vegn giugà, improvisà e chantà. Ils dus teatrist lavuran fitg ferm cun execerzis da corp e coreografias da pantomima quai ch'è per la gronda part dils uffants ina nova experientscha da teater. «E cura fashain nus teater endretg?» è lu era stà la dumonda d'in uffant che ha evocà ina discussiun davart la dumonda «Tge è teater?»

Teater en il gaud

La basa dal teater furma la praula dal curaschus e clever buob Tredischin che parla da chasa per ir a lavurar tier il retg da Frontscha. Da là va el vi sur mar en la Terchia per schemel, cozza e papagagl per gudagnar la figlia dal retg. La scenaria è il gaud da Cumbel. Mintga muvent che l'aura lubescha han las emprovas da teater lieu en il gaud. Per certs uffants ina sfida da semover tras quest terren maluliv plein lenna e crappa, per auters in dilet da raiver per plauncas e plontas enturn.

Sper il teater organiseschan las duas survegladras *Janine Venzin* e *Rica Arpagaus* il passatemp dils uffants. Mintga sera stattan gieus e divertiment sin il program e la gievgia suentermezdi han ils uffants visità il museum regional Casa Carniec a Glion.

Per l'oraifra cuschina procura *Lisa Candinias*. Ed aschia passan ils gis sveltamain cun risadas e larmas, pertgei era il schar encrescher, vegnir malsaus ed accidents fan part da la vita da champ.

Preschentaziun dumengia

Fin dumengia vegn anc filà vid scenas e choreografias, vid chanzuns e texts per che la produziun teatrala daventia in gaudi. La gnarvusadad vegn a crescer cun l'arrivada da geniturs, da tattas e tats, d'indigens e jasters, da tut il publicum che vegn a serimnar questa dumengia a Plaun Rueun sur Cumbel allas 11.00 per lu serender comunablamain el lieu da teater: Il gaud da Cumbel che vegn a scuvierer sia istorgia dal famus Tredischin.



Ils uffants che passentan quest'emna in camp da teater en Lumnezia.